

A PROPOSITU DE "EL POZU PISPIRON" Y OTRES CAVIDAES TEBERGANES

Xosé Lluis del Ríu
Grupu d'Espeleoloxía Gorfolí – Asturias

Nestes caberes dómines, paez que tornó mirase pa **El Pozu Pispirón** (mal nomau pelos espeleólogos "Pozo del Pispillón" o mesmamente "Pozu'l Pispillón") comu pozu escuela ideal, al pie de la **Pena Sobia**, en Teberga.

Esti fechu y el haber asoleyáu nos caberos números del *Filtraciones* dellos artículos nos que se facía referencia a esti pozu, asina como la so topografía (recoyéndolu con un nome que nun ye'l de verdá), moviónos pa asoleyar esti comentariu col que miramos de facer xusticia.

Pero, amás desti **El Pozu Pispirón**, hai otros muchos llugares perinteresantes pa nós en Teberga.

Nesti sen, ye de destacar delles referencies a "pozos" que fai **Xosé Lluis García Arias** nel so trabayu so la toponimia tebergana: "**De toponimia tebergana: (X), Hidrotoponimia**". Asoleyáu nel númberu 30 de la revista "Lletres Asturianas", Uviéu.

Y aunque los nomes de llugar recoyíos pol autor baxo la mesma espresión "pozu" representen realidaes enforma estremaes, en dellos casos trátase d'un pozu fondu, que ye lo que a nós más mos interesa. Tolos nomes deriven del **Llatín "PUTEUM"**. Asina, recueye ente otros:

- **El Pozu'l Ministeriu**: en S.Salvador, xunto a los praos de San Vicente.
- **El Pozu'l Tubu**: ye ún de los llugares onde apaez el ríu que baxa de Parmu, dempués de sumise; esti pozu ta a la vera **Cueva Güerta**.
- **El Pozu Secu**: en Marabiu; ye un pozu de grandes dimensiones; estrémase de **El Pozu L'Agua**, que ta a la so vera.
- **El Pozu la Caldeirina**: en Fresnéu.
- **Los Pozos**: en Fresnéu.
- **Pozaracheiros**: llugar con muchos pozos en Fresnéu.
- **El Pozu Val Gal.lineiru**: en Presorias (Valdesampedru) nel llugar llamáu Val Gal.lineiru.
- **Pozu las Grachas**: pozu onde se meten las grachas, faciendo un ruíu pergrande. En Prau.
- **Pozu Gracheiru**: en Taxa nel métense las grachas.
- **Pozu Calvín**: na llende Campiel.lu y Taxa.
- **El Pozu la Casareta**: en Campos; hubo un casetu nel llugar.
- **El Pozu Mansu**: en Redral; dicen que se fexo esti pozu dempués d'una quema'l pueblu.
- **El Pozu Montoutu**: pozu mui fondu, en Torce.
- **El Pozu la Osa**: en Vil.lanueva.

- **El Pozu la Nieve**: en Fos de la Yegua (Marabiu); baxaben a él a por nieve cuando de branu facía falta pa delles enfermedaes.
- **El Pozu la Pirina**: en Prau; emplegábase pa regar.
- **El Pozu Pispirón**: gran pozu, peligrosu, al pie de la Pena Sobia.
- **El Pozu'l Pládanu**: en Campiel.lu.
- **El Pozu Rudrigu**: en Fos de la Yegua, a la vera'l **Pozu la Nieve**.
- **El Pozu San Fernandu**: en Vil.lanueva.
- **El Pozu los Sapos**: en Santamarta, (Valdecarzana); nel llugar hai carbayos pergrandes.
- **El Pozu sol Veiru**: n'Urría.
- **El Pozu la Xubida**: pozu mui fondu, en Prau.